

欽  
定  
全  
唐  
文

欽定全唐文卷二目錄

高祖二

令裴寂等升殿奏事侍立詔

遣使安撫益州詔

斷屠詔

楚王杜伏威進封吳王賜姓附屬籍詔

收葬道殣詔

赦晉潞等州詔

命秦王征王世充詔

褒高開道來降詔

褒胡大恩來降詔

赦代州總管府內詔

檢校益州夔州獄訟詔

賜秦王獲竇建德手詔

平竇建德大赦詔

令太子建成統軍詔

赦河南諸州詔

平王世充大赦詔

授張鎮周陳知略淮南嶺南行軍總管詔

褒授岐平定等詔

令京官五品以上及諸州總管刺史各舉一人詔

賜方亮詔

命太子建成討劉黑闥詔

修魏周隋梁齊陳史詔

罷差科徭役詔

申禁差科詔

授裴寂蕭瑀左右僕射詔

幸故宅大赦詔

勸農詔

討輔公柘詔

欽定全唐文卷二

高祖二

令裴寂等升殿奏事侍立詔

貴爵尚齒列代通規進秩優賢有國彝訓尚書左僕射魏國公寂太子少保新昌縣公綱左武侯大將軍陳國公抗太常卿沛國公元瑋納言漢東郡公叔達內史令宋國公瑀兵部尚書蔣國公通戶部尚書滎陽郡公善果右武侯大將軍羅侯御史大夫滑國公無逸等或歷任前代職位隆顯或者年夙望德邁老成翊戴經綸功績茂重或險夷

契闊情兼惟舊並職司近侍任兼心膂恩禮所加義從隆渥特宜褒異俾越常倫寂已下奏事及侍立令升殿

遣使安撫益州詔

朕承天明命撫育萬方康俗濟民無忘寢寐西蜀僻遠控接巴夷厥土沃饒山川遐曠往者隋末喪亂盜寇交侵流寓之民遂相雜撓游手墮業其類實繁敗壤矯虔因此而作王業伊始務從草創牧宰庶寮隨事遷易州縣分析權宜廢置然而王道未洽民瘼猶存靜言思之夙夜軫念澄源正本義在更張可令秦州總管鄧國公軌御史大夫滑

國公無逸爲益州道安撫大使宣揚朝典進擢廉平貶黜苛暴申理冤滯孝弟貞節表其門閭鰥寡孤獨量加贍恤事有便宜並委處分

斷屠詔

有隋失馭喪亂宏多民物凋殘俗化踰侈耽嗜之族競逐旨甘屠宰之家恣行剝殺芻豢之畜靡供肴核之資胎天之羣莫遂蕃滋之性傷財墮業職此之繇斂攘穿窬因茲未息禮曰君無故不殺牛大夫無故不殺羊士無故不殺犬豕庶人無故不食珍非惟務在仁愛蓋亦示之儉約方



域未寧尤須節制凋弊之後宜先蕃育豈得恣彼貪暴殘殄庶類之生苟循目前不爲經久之慮導民之理有未足乎其關內諸州宜斷屠殺庶六畜滋多而民庶殷贍詳思厥衷更爲條式

楚王杜伏威進封吳王賜姓附屬籍詔

五等列爵茂績超於恒典四嶽分官連帥總其常賦山河之賞義在酬庸方伯之任實資賢哲使持節和州總管和州刺史東南道行臺尚書令上柱國楚王伏威往因喪亂糾合徒旅綏靜淮瀆緝寧江介閭閻安堵吏民率職遠稟

朝化具申忠款仍請立功掃除多難誠節旣表志識可嘉  
委以招懷特宜受命寵禮之序式加常秩可使持節總管  
江淮以南州諸軍事揚州刺史東南道行臺尚書令淮南  
安撫大使上柱國進封吳王食邑五千戶賜姓李氏附屬  
籍

收葬道殣詔

自隋室不綱政刑荒廢戍役煩重師旅薦興元元無辜墮  
於塗炭轉死溝壑暴骨中原宗黨淪亡邑居散逸墳隴靡  
託營魂無歸朕受命君臨爲民父母率土之內情均亭毒

一物失宜寢興軫慮念茲道殣義先弔恤雖復令已頒下  
普遣葬埋猶恐吏不存心收葬未盡宜令州縣官司所在  
巡行掩骼埋胔必令周悉使郵亭之次無復遊魂窀穸之  
下各安所厝姬文惠化恩及枯骸庶踵於前此焉非遠

赦晉潞等州詔

朕發跡太原陳師汾澮底定皇室廓清函夏惟彼晉魏事  
等豐宛近者妖寇憑陵侵斥郊境害虐良善擁逼吏民大  
軍東討義存拯難芟夷醜類實在弔民凡厥渠魁已就殲  
殄脅從之輩情有可原宜許自新義深蕩滌其晉州潞州

隰州并州等四總管內自武德三年四月二十二日以前  
被劉武周宋金剛等所誣誤者罪無輕重皆赦除之各令  
復業一無所問州縣城堡有固守忠節抗禦凶徒者具錄  
聞奏別加褒賞

命秦王征王世充詔

取亂侮亡聖王於是致治民和衆泰湯武所以成功兵革  
之興義資靖難出軍命將蓋非獲已自隋氏數窮天下鼎  
沸豺狼交爭黔庶凋殘朕受命君臨志存寧濟率土之內  
咸思覆育聲教所覃莫不清晏惟彼伊維尚隔朝風世充

作梗肆行凶暴害虐良善擁迫吏民反道亂常日月滋甚  
禍盈釁積天亡有徵心腹猜攜黨援孤絕農畝荒廢糧廩  
內空城隍社稷勢皆殄潰弔民問罪今實其時可令陝東  
道行臺上柱國秦王世民總統諸軍東踰崤澠分命驍勇  
百道俱進救彼塗炭誅其兇渠凡此授律義在拯民府庫  
貨財一無所利剋敵制勝効策獻功官賞之差並超常典  
其有背賊歸款因事立勲即加寵授務隆優厚

褒高開道來降詔

褒德敘功有國彝訓任賢賞善列代通規僞燕王高開道

家本海隅志懷慷慨有隋之末州域彫殘招集徒旅自保  
邊塞繕修斥堠捍禦寇戎民吏肅清倉庫完實旣而審達  
機變遠慕朝風闔境獻誠歸款內屬請申經略輯寧燕代  
厥功以茂宜從褒寵禮命之差用超常級可使持節蔚州  
諸軍事蔚州總管加授上柱國賜姓李氏上屬籍宗正封  
北平郡王食邑五千戶

褒胡大恩來降詔

疇庸旌善哲王彝訓任賢使能有國通典胡大恩往因隋  
季夷狄交侵繕甲聚徒輯寧邊境旣而阻隔戎寇自保方

隅遠慕朝風因機立效摧破凶黨亭徼無虞抗䟽闕庭以  
申誠節忠義克舉宜隆寵命因其所統即加榮秩可使持  
節代州諸軍事代州總管加授上柱國封定襄郡王食邑  
五千戶賜姓李氏上屬籍宗正

赦代州總管府內詔

祝網泣辜彰乎舊典赦過宥罪著自前經往者劉武周竊  
據邊陲擁逼良善石嶺以北皆罹其弊雖復武周奔竄寄  
命蕃夷而殘黨餘氛尚懷旅拒致使朔漠猶警關塞未寧  
屢動干戈久違聲教代州總管定襄王大恩勤績允著安

輯邊境討擊未賓率其從化朕君臨天下義存撫育念彼彫弊若納諸隍但朔方黎元逆命日久今雖歸附仍懷反側其代州總管府內石嶺以北自從武德四年二月二十九日以前所有愆犯罪無輕重悉從原宥可並令安居復業勿使驚擾

檢校益州夔州獄訟詔

緩刑議獄哲后彝訓解網泣辜前王茂軌朕君臨海內撫育黎元一物乖所納隍興慮其益州道行臺及夔州總管府衆務臻集統攝遐長囚徒禁繫其數不少或控告未申



多有冤屈或注引肆志濫及貞良致使文案稽延獄訟繁  
擁念彼枉滯情深愍惻其益州總管內諸州委御史大夫  
無逸檢校夔州管內委趙郡公孝恭檢校所有囚悉令覆  
察務從寬簡小大以情但有負罪逃亡離棄鄉邑無問輕  
重悉令歸首明加勸導務修墾植庶使家給人足稱朕意  
焉

賜秦王獲寶建德手詔

聞獲建德竟如汝所料畫策者雖吾平定者汝也吾聞黃  
河千年一清乃當今日汝功一也隋氏分離崤函隔絕兩

雄合勢一朝清蕩汝功二也兵旣克捷更無死傷無媿爲臣不憂其父汝功三也吾今開懷抱養蒼生盡其天年心無外慮汝功四也

平竇建德大赦詔

自隋氏失馭政散民流盜賊交侵區宇離析慄慄黔首俱被焚溺之災元元無辜並困豺狼之吻朕受天明命君臨八極克除暴亂大拯黎民聲教所覃無思不服惟彼趙魏尚隔朝風建德往因喪亂連羣結黨竊州據邑擅置官寮叛渙一隅恣行凶虐朕愍彼河朔久遭塗炭納隍軫慮無

忘興寢但以彫弊之後惡煩士衆且事含宏未先討擊然而遊魂放命數稔貫盈驅率犬羊圖爲侵斥與王世充欲相救援輒來舉斧以抗大軍兵威所臨醜徒皆潰生擒建德囚致軍門凡厥支黨皆就虜獲厯年逋寇一舉廓清蕩滌遺民與之更始可赦山東諸州舊爲建德誑誤者自武德四年五月八日以前皆赦其罪仍令太子左庶子鄭善果爲山東道撫慰大使考功郎中李覲玉膳部郎中高正表爲副存問民俗宣布朝章其有率衆全城因機立效者量其功績就加職任奇才異行隨事旌擢其亡命山澤仍

爲結聚詔書到後三十日不來歸首者復罪如初

令太子建成統軍詔

稽胡部類居近北邊習惡之徒未悉從化潛竄山谷竊懷  
首鼠寇抄居民侵擾亭堠可令太子建成總統諸軍以時  
致討分命驍勇方軌齊驅跨谷彌山窮其巢穴元惡大憝  
即就誅夷驅掠之民復其本業行軍節度期會進止者委  
建成處分

赦河南諸州詔

朕初膺靈命撫育萬方一物失宜憂責在己是以昧旦丕

顯昃食忘勞思流惠澤被於率土日者世充作梗僭擅一方侵虐士民阻絕聲教輦洛之地比邑連城受制凶威莫能自勉翹足引領乞師請降朕愍彼黎庶獨爲匪民命將出軍用申撫弔兵威所震醜徒懾伏元惡頓顙面縛軍門殄滅氛祲混同文軌拯彼烝民出乎塗炭宜從蕩滌與之更始可赦河南諸州舊爲世充所誑誤者自武德四年六月四日已前皆赦其罪若有率其部衆保城邑因事立功以歸朝化者量其效績就加職任奇才異行隨事旌擢鰥寡孤獨以時恤理亡命山澤詔書到後三十日不來歸首

者復罪如初

平王世充大赦詔

天生烝民樹之司牧光宅區宇撫字黎庶日月照臨文明  
於是統極雷雨作解順時所以布化往者隋氏代衰政刑  
廢缺九服雲擾五岳塵坌率土之民墜於塗炭瞻天躋地  
控告無所朕愍彼橫流志存拯溺投袂鞠旅肇建義旗伐  
暴除殘克寧宇縣靈祇叶贊遐邇樂推景運所集祗膺寶  
位戡翦多難綏輯遺氓溥彼萬方情均覆育然而世充放  
命擾亂周韓建德遊魂虔劉趙魏害虐良善阻絕朝風言

念匪民久罹凶毒滿堂之樂猶有向隅納隍之歎無忘旦  
夕是以出軍命將伐罪弔民宗廟威靈卿士效節旌旗所  
拂醜徒冰泮二凶授首萬方廓清車軌大同氛祲澄蕩邊  
候解柝烽燧無虞振旅休徒凱歌里忭今旣九圍盡謐八  
表乂寧思與吏民勵精更始又惟寡德政道多違陰陽不  
調致茲亢旱深思惕懼震悼于懷解網崇恩宜流愷澤可  
大赦天下自武德四年七月十二日昧爽已前大辟罪已  
下已發露未發露悉從原免自武德二年十二月三十日  
已前亡官失爵者量聽敘用天下民庶給復一年其陝鼎

函號虞芮六州供轉輸之費幽州管內久隔寇戎給復二  
年身死王事量加褒贈律令格式且用開皇舊法孝子順  
孫義夫節婦所在詳列旌表門閭奇才異行隨狀薦舉高  
年惇獨量加贍恤

授張鎮周陳知略淮南嶺南行軍總管詔

三楚之地江山遐阻五嶺之表經塗遼遠自有隋失馭盜  
賊交侵聲教莫通方隅隔絕朕受圖膺運君臨區宇率土  
之濱情均撫字方今函夏寧乂文軌大同尉候無虞要荒  
率職然而江蠡之派咸阻寇戎閩禺之鄉未聞正朔左武



金史卷之二十一  
二  
候將軍黃國公張鎮周大將軍合浦縣公陳知略二方首  
族早從歷任思展誠效輯寧州里鎮周可淮南道行軍總  
管知略可嶺南道行軍總管以安撫之

褒授岐平定等詔

今東應義旗西開幕府設官分職本在忠誠道士岐平定  
鏹迹求真銷名離俗恬淡榮利無悶幽閒而能徹損衣資  
以供戎服抽割菽粟以贍軍糧忠節丕嘉理須標授平定  
宜授金紫光祿大夫已下並節級授銀青光祿大夫以酬  
其義

令京官五品以上及諸州總管刺史各舉一人詔  
擇善任能救民之要術推賢進士奉上之良規自古哲王  
宏風闡教設官分職惟才是與然而巖穴幽居草萊僻陋  
被褐懷珠無因自達實資選衆之舉固藉左右之容義自  
搜揚理宜精擢是以貢士有適爰致加錫之隆無益於時  
必貽貶黜之咎末葉澆僞名實相乖取非其人濫居班秩  
流品所以未穆庶職於是隳廢朕膺圖馭宇寧濟兆民思  
得賢能用清治本招選之道宜革前弊懲勸之方式加常  
典苟有才藝所貴適時潔己登朝無嫌自進宜令京官五

品以上及諸州總管刺史舉一人其有志行可錄才用未  
申亦聽自己具陳藝能當加顯擢授以不次賞罰之科並  
依別格所司頒下詳加搜別務在獎納稱朕意焉

賜方亮詔

使持節廬山二州諸軍事本州刺史方亮往因喪亂保據  
邑土識達事幾蚤歸朝化勲庸克著誠效達彰念此勤勞  
嘉歎何極今四方平泰尤有廓清宜慰部人修營產業秋  
漸冷卿比平安好在否

命太子建成討劉黑闥詔

關罪止凶渠註誤脅從並無所問其有棄惡思順自拔而  
來隨即安置給其優賞咸使附業各令安堵雖賊之魁帥  
久同叛逆必能臨機效節因事立功並即敘勲班賞量才  
授任如其不從告諭敢懷迷執然後肅正軍法齊以大刑  
其陝西東道大行臺及山東道行軍元帥河南河北諸州  
並受建成處分其閒經略籌筭賞罰科條要在合機皆以  
便宜從事

修魏周隋梁齊陳史詔

司典序言史官記事考論得失究盡變通所以裁成義類

懲惡勸善多識前古貽鑑將來伏犧以降周秦斯及兩漢  
傳緒三國受命迄於晉宋載籍備焉自有魏南徙乘機撫  
運周隋禪代厯世相仍梁氏稱邦跨據淮海齊遷龜鼎陳  
建宗祊莫不自命正朔繇厯歲祀各殊徽號刪定禮儀至  
於發跡開基受終告代嘉謀善政名臣奇士立言著績無  
乏於時然而簡牘未編紀傳咸闕災涼已積謠俗遷訛餘  
烈遺風泯焉將墜朕握圖馭宇長世字民方立典謨永垂  
憲則顧彼湮落用深軫悼有懷撰次實資良直中書令蕭  
瑤給事中王敬業著作郎殷聞禮可修魏史侍中陳叔達

秘書丞令狐德棻太史令庾儉可修周史兼中書令封德彝中書舍人顏師古可修隋史大理卿崔善爲中書舍人孔紹安太子洗馬蕭德言可修梁史太子詹事裴矩兼吏部郎中祖孝孫前秘書丞魏徵可修齊史秘書監竇璡給事中歐陽詢秦王文學姚思廉可修陳史務加詳覈博採舊聞義在不刊書法無隱

罷差科徭役詔

詩不云乎民亦勞止汔可小康自有隋失馭政刑板蕩豺狼競起肆行暴虐徵求無度侵奪任己下民困擾各靡聊

生喪亂之餘百不存一上天降監爰命朕躬廓定凶災乂  
寧區域念此黎庶凋弊日久新獲安堵衣食未豐所以每  
給優復蠲減徭賦不許差科輒有勞役義行簡靜使務農  
桑至如大河南北離亂永久師旅薦興加之饑饉百姓勞  
弊此焉特甚江淮之間爰及嶺外塗路懸阻土曠民稀流  
寓者多尤宜存恤此等諸處往隔寇戎自經開泰歲月未  
久猶恐士民積習不改前弊州縣官人未稱所委迎送往  
來尚致勞費其河北江淮以南及荊州大總管向西諸州  
所司宜便班下自今以後非有別勅不得輒差科徭役及

迎送供承庶令安逸明加簡約稱朕意焉

申禁差科詔

隋末喪亂豺狼競逐率土之衆百不存一干戈未靜桑農  
咸廢凋弊之後饑寒重切永言於此悼於厥心今寇賊已  
平天下無事百姓安堵各務稱職家給人足即事可期所  
以新附之民特蠲徭賦欲其休息更無煩擾使獲安靜自  
修產業猶恐所在州縣未稱朕懷道路迎送廨宇營築率  
意徵求擅相呼召諸如此例悉宜禁斷非有別勅不得差  
科不如詔者重加推罰布告天下咸知此意



授裴寂蕭瑀左右僕射詔

端揆之職綜理百司任望斯重勲賢攸寄尚書左僕射魏國公寂風格清粹局量宏雅早預經綸元功特著變諧治本茂績以宣中書令宋國公瑀志懷忠確業履沖素厯居顯要厲精理術獻納惟允周慎有聞宣穆彝章允釐庶政寂可尚書左僕射瑀可尚書右僕射

幸故宅大赦詔

朕恭膺大寶克隆景祚永言孝思聿追罔極肇惟自昔葺宇舊居王迹所基積慶攸在桑梓之敬每懷踐厯日不暇

給以迄於茲今旣氛祲廓清區夏寧謚民休俗泰天成地  
平爰擇良辰言還邑里禮同過沛事等歸譙故老咸臻族  
姻相會肅恭薦享感慶兼集思俾歡心逮於衆庶愍茲幽  
滯有懷寬澤都輦之地宗祏所居祚固萬邦義越常等時  
惟孟夏方申長育宜順天心宣茲惠澤可曲赦京城內繫  
囚見徒及被推問應集之人死罪已下並從放免其內有  
於政切害情理難原者宜降死從流

### 勸農詔

有隋喪亂區宇分離百姓凋殘弊於兵甲田畝荒廢饑饉

薦臻元元無辜墮於溝壑朕膺圖馭極廓清四海安輯遺  
民期於寧濟勸農務本蠲其力役然而邊鄙餘寇向或未  
除頃年以來戎車屢出所以農功不致倉廩未登永念於  
茲無忘寤寐今旣風雨順節苗稼實繁普天之下咸通茂  
盛五十年來未嘗有此倉箱之積指日可期時爲溽暑方  
資耕耨廢而不修歲功將闕宜從優縱肆力千頃其有公  
私債負及追徵輸送所至處且勿施行尋常營造役使工  
匠事非急要亦宜停止見在囚繫事未決斷傍引支證未  
須追攝百司常務並宜且停内外官人行署以上量事分

番皆盡九月三十日其軍機急速及盜賊之事不在停限  
州縣牧宰明加勸導咸使勦力無或失時務從簡靜以稱  
朕意

討輔公柘詔

禁暴輯兵昔王於是致治亂常于紀有國所以明刑東南  
道行臺尚書左僕射上柱國輔公柘本自凡伍素無藝用  
往因擾亂連結徒旅與吳王杜伏威同心協力保據江淮  
早率數部遠歸朝化錄其功效授以官爵任官方隅榮寵  
兼至不能勵身奉上克保名節遂乃包藏禍心圖爲不軌

自伏威入朝之後公祐恣行專擅違犯朝憲不顧典章徵  
斂穀帛掠奪子女肆其殘忍妄行誅殺驅役士民招聚奸  
盜毒流衆庶怨結遐邇國家務存含養未申刑罰每加懲  
誠冀其自改今乃稱兵內侮假相署置驅扇蟻徒敢行抄  
竊惟彼兇逆速宜勦定命將授律義在安人已令天策上  
將太尉領司徒尚書令陝東道大行臺雍州牧領十二衛  
大將軍上柱國秦王世民爲江州道行軍元帥統率驍勇  
風驅電擊麾旆所臨當即奔潰凡此罪惡止在魁渠脅從  
之徒一無所問縱有已陷賊黨非其本心拔難而來因立

功效此等之類皆從官賞江淮以南比遭毒螫吏民困辱  
各不聊生平定之後普給優賞即令撫慰各令安堵勲賞  
之科具如別格宜明宣布咸使聞知

欽定全唐文卷三目錄

高祖三

令諸州舉送明經詔

賜學官胄子詔

平輔公柝大赦詔

頒定科律詔

擢史孝謙詔

立社詔

授裴寂司空詔

金史卷之二十一  
加齊王元吉司徒詔

沙汰佛道詔

誅建成元吉大赦詔

立秦王爲太子詔

令皇太子斷決機務詔

禪位皇太子詔

封王蘭英爲永壽郡君詔

賜蕭瑀手勅

徙居大安宮誥



答太宗陳讓表手誥

遺誥

舉義旗誓衆文

即位告天冊文

冊秦王天策上將文

命皇太子即皇帝位冊文

草堂寺爲子祈疾疏

賜高麗王建武書

諭李襲志書

賜許紹勅書

勞涪州刺史劉瞻書

欽定全唐文卷三

高祖三

令諸州舉送明經詔

六經茂典百王仰則四學崇教千載垂範是以西膠東序  
春誦夏弦說禮敦詩本仁祖義建邦立極咸必由之自叔  
世澆訛雅道淪缺爰歷歲紀儒風莫扇隋季以來喪亂滋  
甚睠言篇籍皆爲煨燼周孔之教闕而不修庠塾之儀泯  
焉將墜非所以闡揚徽烈敦尚風範訓民調俗垂裕後昆  
朕受命膺期握圖馭宇思宏至道冀宣德化永言墳素深

存講習所以摅撫遺逸招集散亡諸生胄子特加獎勸而  
凋弊之餘湮替日久學徒尚少經術未隆子衿之歎無忘  
興寢方今函夏旣清干戈漸戢搢紳之業此則可興宜下  
四方諸州有明一經已上未被升擢者本屬舉送具以名  
聞有司試策加階敘用其吏民子弟有識性開敏志希學  
藝亦具名狀申送入京量其差品並即配學明設考課各  
使勵精琢玉成器庶其非遠州縣及鄉各令置學官僚牧  
宰或不存意普更頒下早遣立修夫安上治民莫善於禮  
出忠入孝自家刑國揖讓俯仰登降折旋皆有節文咸資

端肅末葉踈惰隨時將廢凡厥生民各宜勉勵又釋奠之禮致敬先師鼓篋之義以明遜志比多闕略更宜詳備仲春釋奠朕將親覽所司具爲條式以時宣下

賜學官胄子詔

自古爲政莫不以學則仁義禮智信五者俱備故能爲利博深朕今欲敦本息末崇尚儒宗開後生之耳目行先王之典訓而三教雖異善歸一揆沙門事佛靈宇相望朝賢宗儒辟雍頓廢王公以下寧得不慚朕今親自觀覽仍徵集四方胄子冀日就月將並得成業禮讓旣行風教漸改

使期門介士比屋可封橫經庠序皆遵雅俗諸王公子弟  
並皆率先自相勸勵

平輔公柘大赦詔

自有隋失馭盜賊交侵四海羣飛六合雲擾上天降鑒爰  
命朕躬戡定凶災廓清宇縣然而江湖之外水鄉僻遠向  
化之民未能自達逆賊輔公柘驅扇凶醜蟻聚蜂屯侵虐  
黎民擾動城邑朕憫茲塗炭義在弔撫命彼偏師聊申薄  
伐沿流而下應機雷剋氛祲清蕩遐邇乂寧文軌大同朝  
野咸慶今朱明戒節時方長育宜順天心播茲仁惠可大

赦天下自武德七年四月一日昧爽已前大辟罪已下已發露未發露繫囚見徒悉原免其犯十惡劫賊官人枉法受財主守自盜及常赦不免流已上道者並不在赦例亡命山澤挾藏軍器百日不首者復罪如初其江州道行軍經途悠遠非無勞倦應供運轉及從軍之內有犯除解官人立勲効者並復官爵仍依本品隨才處分揚越之民新沾大化見在民戶給復一年其與賊同心共爲逆亂非被迫脅情狀難原者不在此例

頒定科律詔

古不云乎萬邦之君有典有則故九疇之敘興於夏世兩  
觀之法大備隆周所以禁暴懲奸宏風闡化安民立政莫  
此爲先自戰國紛擾恃詐任力苛制煩刑於茲競起秦并  
天下隳滅禮教恣行酷烈害虐蒸民宇內騷然遂以顛覆  
漢氏撥亂思易前軌雖復務從約法蠲削嚴刑尚行菹醢  
之誅猶設錙銖之禁安民之化實有未宏刑措之風以茲  
莫致爰及魏晉流弊相沿寬猛乖方綱維失序下陵上替  
政散民凋皆由法令湮訛條章混謬自斯以後寓縣瓜分  
戎馬交馳未遑典制有隋之世雖云釐革然而損益不定



踈密無準品式章程罕能甄備加以微文曲致覽者惑其  
淺深異例同科用者殊其輕重遂使姦吏巧詆任情與奪  
愚民妄觸動陷羅網屢聞釐革卒以無成朕膺期受籙寧  
濟區宇永言至治興寐爲勞補千年之墜典拯百王之餘  
弊思所以正本澄源式清流末永垂憲則貽範後昆爰命  
羣才修定科律但今古異務文質不同喪亂之後事殊曩  
代應機適變救弊斯在是以斟酌繁省取合時宜矯正差  
違務從體要迄茲厯稔撰次始畢宜下四方即令頒用庶  
使吏曹簡肅無取懸石之多奏讞平允靡競錐刀之末勝

殘去殺此焉非遠

擢史孝謙詔

自隋以來離亂永久雅道淪缺儒風莫扇朕膺期御宇靜  
難齊民欽若典謨以資政術思宏德教光振遐軌是以廣  
設庠序益召學徒旁求俊異務從獎擢寧州羅川縣前兵  
曹史孝謙守約邱園伏膺道素爰有二子年並幼童講習  
孝經咸暢厥旨義方之訓實堪勵俗故從優秩賞以不次  
宜普頒示咸使知聞如此之徒並即申上朕加親覽特將  
褒異

立社詔

厚地載物社主其祭嘉穀養民稷惟元祀列聖垂範昔王  
通訓建邦正位莫此爲先爰暨都邑建於州里率土之濱  
咸極莊敬所以勸農務本修始報功敦序教義整齊風俗  
末代澆浮祀典虧替時逢喪亂仁惠弛薄壇壝闕昭備之  
禮鄉閭無糾合之訓朕握圖受歷菲食卑宮奉珪璧以尊  
嚴潔粢盛而禋燎尚想躬稼勵精治本永言享祀宜存往  
紀是以吉日維戊親祀大社率從百僚以祈九穀今旣南  
畝俶載東作方興州縣致祀宜盡祗肅四方之民咸勤殖

藝隨其性類命爲宗社京邑庶士臺省羣官里閭相從共  
尊社法以時供祀各申祈報兼存宴醕之義用洽鄉黨之  
歡且立節文明爲典制進退俯仰登降折旋明加誨勵遞  
相勸獎齊之以禮有耻且格布告天下即宜遵用

授裴寂司空詔

槐路清肅台階重峻經邦論道變諧是屬然而表德優賢  
昔王令典庸勲紀績列代通規尚書左僕射魏國公寂地  
胄清華風神閒悟立志溫裕局量宏雅爰自義旗早參締  
構冥契所感實資同德譬茲梁棟有若鹽梅翊賛綢繆庶

政惟允厯居端揆彝章緝穆元功懋德膺茲重望可司空  
加齊王元吉司徒詔

三台望重仰叶辰曜五教任隆俯安邦國實資懿德式寄  
親賢侍中并州大都督左衛大將軍上柱國齊王元吉器  
量凝邈風神爽邁徽猷夙著嘉譽早隆出莅方岳政績兼  
懋入侍帷宸獻納允屬推轂閫外備展勲庸職司禁旅戎  
章以緝變理之任朝典攸宜可司徒餘如故

沙汰佛道詔

門下釋迦闡教清靜爲先遠離塵垢斷除貪欲所以宏宣

勝業修殖善根開導愚迷津梁品庶是以敷演經教檢約  
學徒調伏身心捨諸染著衣服飲食咸資四輩自覺王遷  
謝像法流行末代陵遲漸以虧濫乃有猥賤之侶規自尊  
高浮情之人苟避徭役妄爲剃度託號出家嗜欲無厭營  
求不息出入閭里周旋闐闐驅策畜產聚積貨物耕織爲  
生估販成業事同編戶迹等齊人進違戒律之文退無禮  
典之訓至乃親行劫掠躬自穿窬造作妖訛交通豪猾每  
罹憲網自陷重刑黷亂眞如傾毀妙法譬茲稂莠有穢嘉  
苗類彼淤泥混夫清水又伽藍之地本曰淨居栖心之所

理尚幽寂近代已來多立寺舍不求閒曠之境唯趣喧雜  
之方繕築崎嶇薨宇舛錯招來隱匿誘納姦邪或有接近  
鄺邸鄰邇屠酤埃塵滿室羶腥盈道徒長輕慢之心有虧  
崇敬之義且老氏垂化本實沖虛養志無爲遺情物外全  
真守一是爲元門驅馳世務尤乖宗旨朕膺期馭宇興隆  
教法志思利益情在護持欲使玉石區分薰蕕有辨長存  
妙道永固福田正本澄源宜從沙汰諸僧尼道士女冠等  
有精勤練行守戒律者並令就大寺觀居住官給衣食勿  
令乏短其不能精進戒行有闕者不堪供養並令罷退各

還桑梓所司明爲條式務依法教違制之事悉宜停斷京城留寺三所觀二所其餘天下諸州各留一所餘悉罷之

誅建成元吉大赦詔

朕恭膺寶位臨馭萬方綏育黔黎於茲九載欲使仁惠之政達於天下德義之方孚於宇宙豈謂莫大之釁近發蕭牆反噬之惡滅於天性皇太子建成地居嫡長屬當儲貳處以少陽冀克負荷遂昵近羣小聽受邪謀蔑棄君親離阻骨肉密圖悖逆潛爲梟獍司徒齊王元吉寄深盤石任惟翰屏寵樹旣厚職位非輕背違天經協同元惡助成隱



慝遞相驅扇醜心逆迹一旦盡彰惟彼二凶罪窮數稔禍  
 不旋踵用取屠戮念茲醜惡慙恨盈懷今禍難旣除氛祲  
 澄蕩國步夷坦政道惟新思與萬民滌除更始可大赦天  
 下自武德九年六月四日申時已前罪無輕重已發露未  
 發露繫囚見徒悉原免凶逆之事止在二人自餘徒黨其  
 被註誤一無所問各從曠蕩其僧尼道士女冠宜依舊軍  
 國事皆受秦王處分

立秦王爲太子詔

儲貳之重式固宗祧一有元良以貞萬國天策上將太尉

尚書令陝東道大行臺尚書令益州道行臺尚書令雍州  
牧蒲州都督領十二衛大將軍中書令上柱國秦王世民  
器質沖遠風猷昭茂宏圖夙著美業日隆孝惟德本周於  
百行仁爲重任以安萬物王跡初基經營締構戡翦多難  
征討不庭嘉謀特舉長算必尅敷政大邦宣風區隩功高  
四履道冠二南任總機衡庶績惟允職兼內外彝章載敘  
遐邇屬意朝野具瞻宜乘鼎業允膺守器可立爲皇太子  
所司具禮以時冊命

令皇太子斷決機務詔

朕君臨率土劬勞庶政昧旦求衣思宏至道而萬機繁委  
成務殷積當展日昃實疲聽覽皇太子世民夙稟生知識  
量明允文德武功平一宇內九官惟敘四門以穆朕付託  
得人義同釋負遐邇寧泰嘉慰良深自今以後軍機兵仗  
倉糧凡厥庶政事無大小悉委皇太子斷決然後聞奏旣  
溥天同慶宜加惠澤爲父後者若有封爵皆令襲繼諸赤  
牒擬授職事官見任者並即爲真其已得替者參選之日  
聽依階敘亡官失爵者量加擢用逋租宿賦及先負官錢  
物悉從蠲免文武官人節級頒賜務存優洽稱朕意焉

禪位皇太子詔

乾道統天文明於是馭歷大寶曰位宸極所以居尊在昔  
勛華不昌厥緒揖遜之禮旁求歷試三代以降天下爲家  
繼體承基裔嗣相襲故能孝饗宗廟卜世長遠貽慶後昆  
克隆鼎祚朕膺期受命握圖闡極大拯橫流載寧區夏然  
而昧旦丕顯日昃坐朝馭朽兢懷履冰在念憂勤庶政九  
載於茲今英華已竭耄期倦勤久懷物表高蹈風雲釋累  
遺塵有同脫屣深求閒逸用保休和皇太子世民久叶祥  
符夙彰奇表天縱神武智韞機深自雲雷締構霸業伊始

義旗之舉首創成規京邑克平莫非其力乃皇極已建天  
步猶艱內發謀猷外清氛祲英圖冠世妙算窮神伐暴除  
凶無思不服薛舉負西戎之衆武周引北狄之兵蝟起蜂  
飛假名竊號元戎所指折首傾巢王世充藉府庫之資憑  
山河之固信臣精卒承閒守險建德因之同惡相濟金鼓  
纔震一縱兩擒師不踰時戎衣大定夷劉闡於趙魏覆徐  
朗於譙兗功格穹蒼德孚宇宙雄才宏略振古莫儔造我  
大唐繫其是賴旣而居中作相任隆列辟百揆時總三階  
以平地屬元良實維固本萬邦咸正兆庶樂推晷緯呈象

休徵允集華夏載佇謳頌知歸今傳皇帝位於世民所司  
備禮以時冊授公卿百官四方岳牧及長吏下至士民宜  
悉祇奉以稱朕意夫政惟通變禮貴從宜利在因民義存  
適要條章法度不便於時者隨事改易勿有疑滯昔漢祖  
撥亂身定大功羣臣推奉光宅帝位而事父資敬五日一  
朝備禮尊崇號稱太上朕方游心恬淡安神元默無爲拱  
揖憲章往古稱謂之儀一準漢代庶宗社之固申錫無疆  
天祿之期永安勿替布告天下咸使知聞

封王蘭英爲永壽郡君詔

師仁乳母王氏慈惠有聞撫鞠無倦提攜遺幼背逆歸朝  
宜有褒隆以賜其號可封永壽郡君

賜蕭瑀手勅

得公之言特存社稷運智者之策以能成人之美納諫者  
之言以金寶酬其德今賚公黃金一函以報智者勿爲推  
退也

徙居大安宮誥

書云知人則哲唯帝難之易曰通其變使民不倦故太伯  
端委周室以隆東海就國漢基方永立權致治不其然乎

朕世襲緇衣家傳鼎業佐魏及周勤勞王室有隋御歷地  
居戚里嘗以補天在慮納揆爲心大業道喪皇極如燬傾  
維折柱天下分離塗炭納隍黔黎殆盡顧茲九有鋒鏑縱  
橫靜念持扶計無所出世民幼懷大度性合天道韞經緯  
之奇文包湯武之宏略深謀秘策沃朕拯溺之心壯思雄  
圖起予救焚之志因其感激許以經綸糾合義師投袂而  
起車次於平陽之郊劒及於孟津之會元戎所指冰消霧  
捲曾未浹旬廓清京邑定非常之業建不世之功三古以  
來未之聞也朱旗西指則仁杲喪元白羽東臨則世充泥



首摧武周如拉朽收建德若拾遺至若黑闥逋誅圓朗小醜三捷七擒不可勝計一人之力冠今超古暴之遐邇豈待昌言往以建成嫡長冀其養德日就不謂匿怨友于忌能毀善讒言屢發殆至鑠金賴天啟朕心宗社降福密悟凶邪指麾殲殄朕媿受浸潤深念元功乃敬授帝圖先天傳政懼其溢滿驕上未稱三靈之心縱慾肆情不恤萬方之重朕故仍居紫極處之肅成察其復禮觀其齊政露往霜來四載於茲矣比聞思我王度克難克艱昧旦丕顯去奢去泰朝夕視膳蒸蒸之性日嚴景憂民翼翼之情日

慎南越驟水北狄款關四海晏然五兵偃戢招君璋之衆  
只用尺書屠師都之城無虧寸刃公卿輯睦遠邇乂安金  
鼓絕於疆場玉鏡懸於億兆盡善盡美吾無閒然匪天祐  
之孰能至此令月吉辰風調雨順朕俯觀人事仰鑒穹旻  
當養性別宮使其正位居極宜令有司具禮務在周備朕  
得脫屣高蹈擬跡於軒轅授厯傳璽爰屬於啟誦大寶旣  
固卜年惟永付託有所何樂如之百辟卿士等或晉陽從  
我同披荆棘或秦邸故吏早預腹心並以德舉言揚進忠  
顯孝保乂社稷天平地成惟當帶礪山河與國休戚可悉

心輔弼無黨無偏罔或隳哉替爾丕績善事元首稱朕意  
焉

答太宗陳讓表手誥

君之於臣尚須採察父之審子豈可同常汝夙懷忠孝吾  
愛汝亦過於諸子況立功德具如前詔所恨吾受讒言幾  
至投杼上元降福神器安寧此乃宗廟有靈非獨吾之幸  
也比察汝布政聽汝德音洋洋盈耳副吾所望昔齊有糝  
政而致小白晉有艱難而獲重耳今天下慶賴在汝一人  
頃者寒暑不調水旱乖節止是吾之與汝安處未得其位

乃致承乾所居非少陽之體吾今往西官方思萬代之福  
汝何勞撓抑頻此言請且深思大道永保社稷善始令終  
無或懈怠奉行吾誥勿以小讓爲懷至公之言彼宮此室  
勢何殊也異姓賢者尚欲權之今汝已克負荷應茲當璧  
極慰吾意宜絕常辭也

遺誥

嗚呼夫受命終畢人之大倫修短之所共同聖賢之所不  
免朕往逢喪亂思濟黎元櫛風沐雨東征西伐尅平宇內  
從此樂推遂膺景命恭承寶厯但蒙犯矢石羈束戎旅久

厭干戈常思閒逸是以拂衣高謝歸老櫟陽爰委萬幾屬  
之才子所授得人遐邇寧輯四海清晏八表來庭養志怡  
神於今十載但去秋已來風疾咸發自爾彌留至於大漸  
皓首歸全斯何恨矣洮頽憑几略陳素志朕每覽漢文遺  
詔慙懃歎焉以爲當今之世咸喜生而惡死厚葬而破業  
重服以傷生吾甚不取且朕旣不德無以佐百姓今崩又  
使重服久臨以罹寒暑之數以重吾之不德謂天下何吏  
民令到出臨三日皆釋服無禁嫁娶飲酒食肉此豈非深  
達天命哀矜百姓者歟又魏文終制亦有可取朕雖德愧

古人豈忘景行屬纊之後三日便殮文武官人三品已下三日朝晡哭臨十五舉音事訖便出四品已上臨於朝堂殿中當臨者非朝夕臨時無得擅哭其方鎮岳牧在任官人各於治所舉哀三日且今王師四討軍機急速小殮旣竟嗣子宜於別所視事軍國大事不得停闕尋常閒務任之有司其服輕重悉從漢制以日易月於事爲宜其園陵制度務從儉約斟酌漢魏以爲規矩百辟卿士孝子忠臣送往事居勿違朕意焉

舉義旗誓衆文

夫天地定位否泰迭其盛衰日月著明虧昃貶其貞滿惟神莫測尚乃盈虛矧茲王道能無悔愴古先帝世炎漢商周撥亂乘乾多厯年所厥嗣墜緒時屬艱危則其股肱宰衡藩屏親戚勦力同獎推心翼戴顛或可扶紕合而奔官守惡不可救廢放而安宗社伊霍桓文並其人也率爾踵武代有其事布在方策可得而言日者蒼精云謝炎運將啟上天眷命屬乎隋室於是我高祖文皇帝以后父之尊周親入相豹變陝左龍飛漢東誅尉迥於韓魏則神鉦遏響勦王謙於巴蜀則靈山斯鏤四罪咸服九有樂推經綸

帷幄之間揖讓巖廊之內造我區夏不更期月舜禹以來  
受終未有如斯之易者以故臨朝恭己庶績爲心親覽萬  
幾平章百姓兢兢慎於馭朽翼翼懼於烹鮮齊六合爲一  
家等黔黎於赤子有陳不率殄虐政於江湖獯醜相屠降  
封虜於沙漠其弔民也如彼其和戎也若茲散馬牛於山  
林鑄劒戟爲農器求瘼恤隱訟息刑清輕徭薄賦家給人  
足倉庫流行於里閭職貢委輸於帑藏豈獨水衡貫朽常  
平粟紅而已哉加以愛民治國節用而敦本深根固蒂因  
河而踐華肆覲朝宗止於京邑元覽縱觀弗踰岐下遐邇



叶和内外禔福凱澤洋溢休祥紹至一世之氓咸賴仁壽  
二紀之治可謂隆平揚摧往初厯選前辟詩書所美莫之  
能尚然聖人千慮失於知子以正萬國輕易元良廢守器  
之長立不才之庶兆亂之萌於是乎在異哉今上之行已  
也獨智自賢安忍忌刻拓狂悖爲混沌苟鳩毒爲恣睢飾  
非好佞拒諫信讒敵怨誠良仇讎骨肉巡幸無度窮兵極  
武喜怒不恒親離衆叛御河導洛肆舳艫而達江馳道緣  
邊徑長城而傍海離宮別館之所在車轍馬跡之所向咸  
塹山而陁谷畢結瑤而構瓊遼水屢征殲丁壯於億兆伊

谷轉輸斃老幼於百萬禽荒罄於飛走蠶食窮於水陸征  
稅盡於重斂民力殫於勞止十分天下九爲盜賊荆棘旅  
於闕廷豺狼充於道路帶牛佩犢輟耕者連孤竹而寇潢  
池鋤耰棘矜大呼者聚萑苻而起芒澤青羌白狄剽夷道  
而闕二黃巾赤眉屠閭左而竊號暴骸如莽僵尸若麻敵  
國滿畫鷁之舟胡越繞和鸞之轂四海波振而冰泮五嶽  
塵飛而土崩踞積薪以待然鉗衆口而寄坐明明皇祖貽  
厥無人赫赫宗隋滅爲亡國某以庸虛謬蒙嘉惠承七葉  
之餘慶資五世之克昌遂得地居戚里家稱公室典驍衛

之禁兵守封唐之大宇義無坐觀綴旒之絕不舉勤王之師苟利社稷專之可也廢昏立明敢遵故實今便興甲晉陽奉尊代邸掃定咸維集寧寓縣放後主於江都復先帝之鴻績固配天於圜寢存司牧於蒼生豈謂一朝言及於此事不獲已追增感歎凡厥士民義旅豪傑敏究時難曉達權謀家怨國耻雪乎今日從我同盟無爲貳志有渝此盟神其殛之

即位告天冊文

皇帝臣某敢用元牡昭告於皇天后帝生人以來樹之司

牧睠命所屬謂之大寶厯數所在罔或偷安故舜禹至公  
揖讓而興虞夏湯武兼濟干戈以定商周事乃殊途功成  
一致後之勦業咸取則焉某承家慶世祿降祉曰祖曰考  
累功載德賜履參墟建侯唐舊地居戚里門號公宮承緒  
建基足爲榮矣但有隋屬厭大業爽德饑饉師旅民胥怨  
咨謫見咎徵昭於皇鑒備聞卑聽所不忍言某守晉陽馳  
心魏闕援手濡足拯溺救焚大舉義兵式寧區宇懲邊荒  
之辮髮輯兆庶之離心誓以捐軀救茲生命掃除喪亂期  
之又安有功繼世無希九五惟身及子竭誠盡力率先鋒

鋪誓以無二再蒙宏誘克濟艱難電掃風驅廓清天邑傳  
檄而定岷峨拱手而平關隴西戎即敘東夷底定非啟非  
贊孰能茲速尊立世嫡翼奉宗隋勳力輔政無虧臣節值  
鼎祚云革天祿將移謳歌獄訟聿來唐邸人神符瑞輻湊  
微躬遠近宅心華夷請命少帝知神器有適大運將去遜  
位而禪若隋之初讓德不嗣羣情逼請六宗闕祀七政未  
齊罪有所歸恐當天譴請因吉日克舉前典設壇肆類祇  
謁上帝惠茲下人翼子謀孫罔敢愆德則小則大無或有  
違對越鴻休伏深慚懼謹遣太尉公裴寂等用薦告之禮

瑞冊蒼璧秬鬯清酌薌合薌其明粢嘉蔬禋祀於皇皇后  
帝明靈降享闕備羽儀法物臨軒大赦天下改義寧二年  
爲武德元年

冊秦王天策上將文

維武德四年歲次辛巳十一月甲申朔二日乙酉皇帝若  
曰於戲咨爾太尉尚書令左右武侯大將軍陝東道行臺  
尚書令涼州總管秦王世民夙標器望早樹風猷業創經  
綸功高運始重以廓清秦隴剪伐鯨鯢掃蕩河汾芟夷凶  
逆周韓大盜趙魏逋誅二寇弗賓用阻朝化嚴兵輦洛總

率戎麾內運奇謀外申威略凶渠攝竄假命危城河朔蟻  
徒來相赴援一鼓誓衆以擒建德迴戈旋指遂獲世充二  
方克定師不再舉武節旣宣朝風遐暢宏規懿績獨冠卿  
尹宜錫寵章式加殊號光備禮物特超恒典是用命爾爲  
天策上將位王公上領司徒陝東道大行臺尚書令增邑  
二萬戶通前三萬戶餘如故加賜金輅一乘袞冕之服玉  
璧一雙黃金六千斤前後二部鼓吹及九部之樂班劍四  
十人欽哉恭承寵命可不慎歟

命皇太子即皇帝位冊文

夫天生蒸民樹以司牧三靈輔德百姓與能粵自夏殷傳  
業裔祚軌物長世率繇茲道朕祗膺靈命肇開寶厯聲教  
所覃無思不服然而萬幾填委九區輻湊明發不寐極夜  
觀書聽政勞神經謀損慮深思閒曠釋茲重負咨爾聰明  
神武德實天生君人之量爰備夙成王業初基雲雷伊始  
英謀獨斷祕策潛申及拓定關隴澄清河雒北通元塞東  
靜青邱宏圖遐舉元功克茂氛霧廓清鯨鯢斯盡澤霑方  
外聲暢無垠總統機衡百工以乂敷宏德化四門允穆謳  
歌所屬宇內宅心象緯告徵靈命斯在朕是用上稽蒼昊



俯順黔黎推而弗居永垂顯號致皇帝位於爾躬今命司空上柱國魏國公寂尚書左僕射上柱國宋國公瑀齋璽綬授爾其纂承洪緒對揚休命式隆寶祚以康四海

草堂寺爲子祈疾疏

鄭州刺史李淵爲男世民因患先於此寺求佛蒙佛恩力其患得損今爲男敬造石碑像一鋪願此功德資益弟子男及合家大小福德具足永無災郭弟子李淵一心供養

賜高麗王建武書

朕恭膺寶命君臨率土祇順三靈綏柔萬國普天之下情

均撫字日月所照咸使乂安王旣統攝遼左世居藩服思  
稟正朔遠修職貢故遣使者跋涉山川申布誠懇朕甚嘉  
焉方今六合寧晏四海清平玉帛旣通道路無壅方申輯  
睦永敦聘好各保疆場豈非盛美但隋氏季年連兵構難  
攻戰之所各失其民遂使骨肉乖離室家分析多厯年歲  
怨曠不申今二國通和義無阻異在此所有高麗人等已  
令追括尋即遣送彼處有此國人者王可放還務盡撫育  
之方共宏仁恕之道

諭李襲志書

卿昔久在桂州仍屬隋室運終四方圯絕率衆保境未知  
所統朕撫臨天下志在綏育眷彼幽遐思沾聲教況卿朕  
之宗姓情異於常一家弟姪並立誠效公又分遣首領申  
諭諸州情深奉國甚副所望卿之子弟並據州縣俱展誠  
績每所嘉歎不能已已令並入屬籍著於宗正

賜許紹勅書

昔在青衿同游庠序博士吳玉其妻姓仇追想此時宛然  
在目荏苒歲月遂成累紀且在安州之日公家乃莅岳州  
渡遼之時伯裔又同戎旅安危契闊累葉同之其間游之

金史卷之三  
處觸事可想雖盧綰與劉邦同里吳質共曹丕接席以今  
方古何足稱焉而公追硯席之舊歡存通家之曩好明鑒  
去就之理洞識成敗之機爰自荆門馳心絳闕惠懷士庶  
糾合賓寮踰越江山遠申誠款覽此忠至彌以慰懷

勞涪州刺史劉瞻書

涪州之全卿之力也功績垂成念自勗勵富貴之事非卿  
而誰